

-Mii ráhkadit ođđa filmma

- jus buot manná nu movt hálidit, lohket Amandus-vuoitit

Guovdageainnu nuoraidskuvlla 9. luohká oahppit ráhkadedje komediijafilmma, ja vuite dainna Amandus-bálkkašumi. Sii eai vuollán dása, ja leat dál juo álgán jurddašit

makkár boahhte filbma galgá šaddat. -Jus heive nu skuvllain boahhte jagi, de mii ráhkadit fas komediija-filmma, mitalit sii Áššui.

NILSSE-NIILLASA JOHAN MÁHTE ÁNTE

Áššu deaivá nuorra filbma-dahkkiid Guovdageainnu nuoraidskuvllas. Sii leat dál juo moadde vahku beassan vuoinjastit dan rájes go dan besse gullat ahte sii vuite Amandus-bálkkašumi iežaset "Miss Blondie" filmmain. Sii vástidit Áššui ahte go sii 8. luohkás galge válljet maid sii áigot bargat prošeaktabargun, de orui filbmaráhkadeapmi hui somá.

- Mii eat háldan barggu mii lea hui dábalaš, ja filbmadahkan orui hui suohtas. Danin mii mearrideimmet dan geahččalit, mitala Ellen Sofie Henriksen (14). Earát lasihit vel dasa ahte Ellen Sofie lei regissøra dan filmmas.

Guhká bargan

-Mii leat guhká bargan dáinna filmmain, ovdal go viimmat oaččuimet dan gárvvisin, mitalaaba ges Sara Berit Anne Gaup (14) ja Máret Steinfjell (14). Soai čilgeba ahte go sii eai diehtán eai maidege filbmadahkama birra, de manai olu áigi plánemii ja oahppamii. Dán oktavuodas sii hálidit ge giitit Mikal Mienna, gii lea sidjiide leamaš stuora veahkin, ja oahpahan eatnasa maid leat oahppan.

-Okta eará mii ájihii min, lei ahte mii nu mángga geardde rievda-deimmet filmma mánusa, čilgejit nuorat viidáseappot.

-Mii oainnat leat nu iešgudetlágan olbmot, ja buohkain lea oai-vil juoga masa, danin ádjáneimmet buot oai-villiid gođđit oktii, lohkaaba ges Ellen Sofie ja Risten J. Hætta (14).

Ieža movttidahtán

Nuorat sáhttet maid mitalit ahte ii buot dainna bargguin mannan nu njuovžilit go sáhtášii. -Muhtomin mii leimmet meastta vuolláneamen, muhto de goit lei ain mis muhtun dan máde garas ahte oaččuie iežas, ja earáid maid joatkit, lohket sii.

Nuorat lohket iežaset gal goitge bures bargan ovttas, ja mitalit dan seammás ahte eanas bargu lea skuvlaáiggis dahkkon.

-Redigeren-bargu gal lea maid eahkediid dahkkon, doppe Guovdageainnu suohkana mediabajis, čilgejit nuorat. Sin mielas lea dat hui váidalahtti ahte mediabadii ii šat leat doaimmas, muhto sii sávvet ahte dat čavčča rájes fas doaimbagoahtá.

Ođđa filmma

Nuorat leat vuoittuin movttiiduvvon eambo bargat filbmadahkamiin, ja leat dál juo jurddašamen ođđa filmma birra. Sii lohket ahte jus skuvlla oktavuodas besset boahhte jahkái dákkár prošeavttain fas bargat, de sii gal dahket dan.

-Dat filbma šaddá maid komediija-filbma, muhto ii galga gal leat joatka dahje seammalágan go "Miss Blondie", bohkosit sii ja jotket:

-Dál mii gal doavut jođáneappot mannat filbmaráhkadeamiin, go dál eat dárbbas buot oahppat. Mii leat olu oahppan ovddit filmmas, ja dat addá vuodu bargat boahhte filmmain.

Sii eai astta nu beare guhká Áššuin humadit, skuvlabarggut vurdet, muhto sii lasihit goit vel loahpas ahte sin eallin ii gal nu bearehaga leat rievdan mannel Amandus-bálkkašumi.

-Vaikko soapmasat namuhit ahte leat min dahje min filmma TV'as oaidnán, de goitge eai leat min beavvit nu bearehaga rievdan, loahpahit sii.

Miss Blondie

Filbma bistá sullii 5 minuvtta ja 30 sekundda, ja lea muhtun nieidda birra (Máret Steinfjell) gii vuordá bártni (Jan Henrik Sara) guossái. Son geahččala činadit ja gáhkket dassázi go bárdni olle, muhto ii lihkostuva nu bures ja dat dagaha olu suohtas dáhpáhusaid. Filmmas lea maid nubbi nieida mielde (Sara Berit Anne Gaup). Filmmas hupmet sámegeiela ja dat lea juo moatte geardde oidnon TV'as.



NUORRA FILBMADAHKKIT: Sii ráhkadedje komediijafilmma Miss Blondie, ja vuite Amandusbálkkašumi. Dál sii leat veahá beassan bosihit, muhto sii eai bisan dása: Sii leat juo jurddašamen ráhkadit ođđa filmma, jus buot manná nu movt ieža hálidit. Govas oaidnit: (ovddabealde) neavttár ja filbmadahkki Máret Steinfjell (14), (gurutravddaš olgešvuolui) filbmadahkki Risten J. Hætta (14), filbmadahkki (- Regissøra, lohket earát) Ellen Sofie Henriksen (14) ja neavttár ja filbmadahkki Sara Berit Anne Gaup (14). Jan Henrik Sara (14), gii maid nevtii filmmas, ii šaddan mielde govvii.